

四庫全書

子部

欽定四庫全書

子部

格致鏡原卷

八十三

詳校官中書_臣羅錦森

侍讀_臣孫球覆勘

總校官中書_臣朱 鈐

校對官原任典簿_臣郭祚熾

膳錄監生_臣楊其梓

欽定四庫全書

格致鏡原卷八十

大學士陳元龍撰

鳥類

四

鷗

禽經鷗信鳥也信不知用注鷗水鳥如鶴鷗而小隨潮而翔迎浪蔽目曰信鷗食小魚鰕螯之屬雖潮至則翔水嚮以為信反為鷺鳥所擊是知信而不知所以自害也埤雅鷺鳬屬蒼色鳬好沒鷺好浮故鷺一名漚

列子曰漚鳥之至者百往而不止今字从鳥後人加之也蒼頡解詁曰鷺鷥也生藕葉上今鷗一名水鴉形色似白鴿而羣飛格物總論鷗水鳥色白數百為羣多在漲海中隨潮上下常以三月風至乃還洲嶼頗知風雲若羣飛至岸必風海語海鷗似鷺而大不識人舶過常集人肩頂人輒捕而烹之海物異名記鷗之別類羣鳴皆皆隨潮往來謂之信鳧清異錄隋宦者劉繼詮得芙蓉鷗二十四隻以獻毛色如芙蓉帝甚喜置

北海中曰鷗字三品鳥宜封碧海舍人 清異錄鄭遨
隱居有高士問何以閱目對曰不注目於婆婆兒即側
耳於鼓吹長謂玩鷗而聽蛙也

鳧

埤雅鳧好沒大小如鴨青色長毛背上有文卑脚短喙
水鳥之謹愿者也 格物論鳧野鴨頭上有毛數百為
羣泊江海間食沙石皆消化唯食海蛤不消隨其糞出
且其曹蔽天而下聲如風雨所至田間稻梁必為之空

廣志野鴨雄者赤頭有距鶩生百卵一日再生有露
華鶩以秋冬生卵竝出蜀晨鳧肥而耐寒宜為臠禽
經注鶩野鴨也飛止大澤之中羣處既褻擾之惡其族
類而相逼逐也 景苑詳註鳧常以晨飛故云晨鳧

埤雅鳧善趨 採蘭雜志鳧一名少卿 方言齊宋之

間凡物盛多謂之寇郭注今江東有小鳧其多無數俗
謂之寇鳧 纂文鴈施石檄开零皆野鴨沒食曰維長
頸曰施多白曰开零山間曰石檄 急就章春草雞翹

鳧翁濯顏注鳧翁頸上毛也

晉書惠帝中人有得鳥

毛三丈以示張華華見慘然曰此謂海鳧毛也出則天下亂矣 吳錄婁縣有石首魚至秋化為寇鳧鳧頭中尚有石也 南越志化蒙縣祠山上有池池中有松鳧如今野鳧棲息松間 方言野鳧小而好沒水中者南楚之外謂之鷺鷥大者謂之鷺鷥

鷺鷥

詩小雅鷺鷥在梁戢其左翼張載注禽鳥竝棲一正一

倒戢左翼以依於內舒右翼以防患於外左不用而右便故也 古今注鴛鴦水鳥鳬類雌雄未嘗相離人得其一則其一相思而死故謂之匹鳥 禽經鴛鴦玄鳥愛其類 鄭氏婚禮謁文贊鴛鴦鳥雄雌相類飛止相匹 埤雅雄鳴曰鴛鴦鳴曰鴛 格物志鴛鴦文禽也似鳬毛有五采 鹵史浮游雄左雌右宿雄翼右掩左雌翼左掩右 埤雅鴛鴦好內思 山堂肆考鴛鴦交頸而感 荆楚記鴛鴦名節木鳥 孔六帖鴛鴦尤異者養

雛於土窟破冢之間能使狐衛其子 史異宋慶元三
年池州銅陵縣鴛鴦雄化雌 朝野僉載漢時鄆縣南
門兩扇忽一聲稱鴛一聲稱鴦晨夕開之聲聞京師漢
帝惡之令毀其門兩扇化為鴛鴦相隨飛去 拾遺記
南方有鳥名鴛鴦形似雁徘徊雲間棲息高岫足不踐
地生於石穴中萬歲一交則生雛千歲銜毛學飛聖君
之世來入國郊

翡翠

禽經背有采羽曰翡翠注狀如鷄鵲而色正碧鮮縟可愛飲啄於澄瀾洄淵之側尤惜其羽日濯於水中今王公之家以為婦人首飾其羽直千金賈琮傳注翠鳥形似燕翡赤而翠青事物原始翡雄也大如鳩其毛赤紫羽青不深而無光林棲而不食魚翠雌也形大如燕青黑色翎深青而有光入水食魚說文翡赤羽雀翠青羽雀也倉頡解詁鵲翠別名也山海經孟山多白翡翠異物志翠鳥先高作巢及生子愛之恐墜

稍下作巢子生羽毛復益愛之又更下巢也 埤雅翡
翠各據溪曲以居以自藏匿猶雉之分畿雖飛不越分
域也 海槎餘錄翡翠生於深黎之茂林峻嶺人罕得
見傳云晴霽日中始一出陰晦竟日不出小大僅侔梁
燕羽翰五色離披可愛人必積久探視羅其巢始獲之
也 漢書尉佗獻文帝翠鳥千 徐廣車服志天子金
根車翠羽蓋皇后首飾步搖加翡翠 樹萱錄張確嘗
遊雪上白蘋洲見二碧衣女子攜手吟咏確逐之化為

翡翠飛去 埤雅名前為翡名後為翠舊云雄赤曰翡
雌青曰翠其小者謂之翠碧一名魚虎一名魚師性善
捕魚故曰魚師魚虎也荆王以其羽毛飾被左氏傳所
謂翠被豹舄是也今花工亦取以為婦人面飾 爾雅
鴈天狗注小鳥也青似翠食魚江東呼為水狗 本草
鴈一名水狗又名魚師又名翠碧鳥

鷺

詩疏鷺水鳥也好而潔白故謂之白鳥齊魯之間謂之

春鋤遼東樂浪吳揚人皆謂之白鷺大小如鴟青脚高
尺七八寸尾如鷹尾喙長三寸所頭上有毛十數枚長
尺餘毳毳與衆毛異甚好將欲取魚時則弭之今吳人
亦養焉好羣飛鳴楚威王時有朱鷺合沓飛翔而來
舞則復有赤者舊鼓吹朱鷺曲是也然則鳥名白鷺赤
者少耳步於淺水好自低昂故曰春鋤亦曰獨春青脚
喜翹善感捕魚其翔集必舞而後下性惡露雌雄相盼
則產 變化論鷺目成而受胎 格物論鷺鷥林棲朝

出捕鰯魚而食夜歸宿其處百千為羣禽經水禽之
味多長而尾多促若鷺之類是也鷺啄則絲偃鷹捕則
角弭藏殺機也 陸游入蜀記蜀中梁山軍鷺鷥為天
下第一 談苑人畜鷺鷥雖馴熟然至飲秋水則飛去
埤雅鷺亦謂之白露今人畜之極有馴擾者每至白
露降日則定飛揚而去不可復畜矣 海錄鷺一名帶
絲禽 詞林海錯宋李昉畜五禽以鷺為雲客 樹萱
錄刻人賈傳於鏡湖泊舟夜月縱步於清水芳荷中見

二叟立語一曰碧繼翁一曰篁棲叟相與吟詩賈遽揖
之化為白鷺飛去 事物原始東坡詩稱鷺為雪衣兒
杜牧賦稱風標公子廣記云荻塘女子 黎州圖經黎
州通望縣每歲孟夏有白鷺鷺一雙墜地古老傳云衆
鳥避瘴臨去留一鷺祭山神又每郡主將有除替一日
前須有白鷺鷺一對從大渡河飛往州城盤旋棲泊三
五日却廻軍州號為先至鳥便迎新送故更無誤焉
爾雅注白鷺頭翅背上皆有長翰毛今江東人取以為

曉攤名之曰白鷺縑 張知白唐臺儀舊制御史以鷺
羽飾車以白鷺見淵中魚之象御史察隱微之罪 天
中記鷺者鼓之精

鷓鴣

楊孚異物志鷓鴣能沒於深水取魚而食之不生卵而
孕雛於池澤既胎而又吐生多者生七八少生五六相
連而出若絲緒焉水鳥而巢高木之上 本草衍義寇
宗奭嘗官於醴州公宇後有大木一株其上有鷓鴣巢

日夕觀之既能交合兼有卵殼布地其色碧豈得云雛
吐口中耶 埤雅鰓鰻水鳥似鵝而黑一名鵓鵓曲如
鈎食魚入喉即爛其熟如湯其骨主鯁及噎 格物總
論鰓鰻大於鴨色純黑觜長三寸許而尖善入水捕魚
也 夔州圖經峽中人以鰓鰻捕魚謂之烏鬼 埤雅
峽中人謂鰓鰻為烏鬼蜀人臨水居皆養此鳥繩繫其
頸使之捕魚得魚則倒提出之杜甫詩云家家養烏鬼
是也 紺珠鰓鰻一名摸魚公 清異錄取魚用鵓鵓

快捷為甚江湖漁郎用鷓鴣者名烏頭網北史倭人
以小鑲掛鷓鴣項令入水捕魚日得百餘頭以充食
方書鷓鴣矢曰蜀水花研水服之令人斷酒其頭治鯁
及噎

鷓鴣

埤雅溪鷺五色尾有毛如船舵小於鴨性食短狐在山
澤中無復毒氣故淮賦云溪鷺尋邪而逐害此鳥蓋溪
中之勅邪逐害者故以名云陳昭裕建州圖經溪鷺

於水渚宿先少若有勅令也亦共浮游雄者左雌者右
羣伍皆有式度 詞林海錯宋李昉畜五禽以鵠鵠為
西客 續博物志鵠鵠能勅水故宿水而物不害 研
北雜志世但知有鵠鵠而不知有所謂鳧鵠者鵠鵠嘴
長鳧鵠嘴短皆絕相似而實不同蓋其色則俱為鵠而
喙有鵠鳧之異此前所未聞也

鵠鵠 附鵠玉

爾雅鵠鵠注似鳧脚高毛冠江東人家養之以厭火

災禽經鵙鵙睛交而孕注相視而睛不眩轉孕而生
雛 卑雅鵙鵙一名鵙鵙一名鵙似鳧脚高毛冠舊云
鵙鵙長目其睛交故有鵙鵙之號相如所賦交睛旋目
者是也禽經曰旋目其名鵙交目其名鵙方目其名鵙
異物志鵙鵙巢於高樹生子在窟中雛未能飛皆銜
其母翼以飛上下故淮賦曰鵙鵙銜翼而低昂 格物
總論鵙鵙翡翠紫纓大如鳧

屬玉 三輔黃圖屬玉水鳥似鵙鵙又曰鵙玉似鵙而

大長頸赤目紫紺色

鵜鵠

爾雅鵜鵠郭璞注今之鵜鵠也好羣飛沉水食魚故名滂澤山海經盧其山沙水南流注于滂水中多鵜鵠狀似鴛鴦人足其鳴自設見則國多土功注今鵜鵠足頗似人脚也張華禽經注鵜鵠水鳥也似鶚而大喙長尺餘頷下有胡如大囊受數升湖中取水以聚羣魚候其竭涸奄取食之一名淘河詩曰維鵜在梁志在

水也 陸璣詩疏鵜喙長尺餘直而廣口中正赤頷下
胡大如數升囊好羣飛若小澤中有魚便羣共抒水滿
其胡而棄之令水竭盡魚在陸地乃共食之故曰淘河
淮南子鵜鵠飲水數斗而不足鰾鮪入口若露而死
顏師古曰鵜鵠一名沐澤 孔志約本草鵜鵠一名
淘河胃有兩塊肉如拳云昔為人竊肉入河化為此鳥
今猶有肉因名淘河 田家五行鵜鵠鵞鵠之屬其狀
異常每來必主大水至正庚寅五月方梅水漲忽見此

鳥數十自西而東衆謂沒田先兆一老農曰不妨夏至
前來曰犁湖至後曰犁途以其觜狀如犁湖言水深途
言水淺今至後八日水退矣果驗

鵲鵲

埤雅鵲鵲雖渠蓋雀之屬飛則鳴行則搖大如鵠長脚
尾腹下白頸下黑如連錢故杜陽人謂之連錢義訓曰
鵲鵲錢母其頸如錢文物類相感志脊令俗呼雪姑
其色蒼白似雪鳴則天當大雪極為驗矣庶物異名

疏毛詩疏義鵲鵲水鳥一名雛渠類考一名精列一名
錢母禽經云鵲鵲共母者飛鳴不相離詩人取以喻兄
弟相友之道也

鷺

古今注扶老禿鷺也狀如鶴大者高七八尺善與人鬪
好啗蛇脯羞食之益人氣力走及奔馬也 吳都賦注
鷺如鷺而大長頸赤目其毛辟水毒丹陽鄱陽皆有之
埤雅鷺性貪惡今俗呼禿鷺劉楨魯都賦綠鷺葱鷺

鷺色蓋青也 五行志開成五年六月有禿鷺羣飛集
禁苑

鸛

詩豳風鸛鳴于垤注天將雨蟻封土為垤鸛鳴其上則
雨將至也 詩疏鸛鸛雀也似鴻而大長頸赤喙白身
黑尾翅樹上作巢大如車輪卵如三升杯望見人按其
子令伏徑舍去一名負釜一名黑尻一名背竈一名阜
裙又泥其巢一傍為池含水滿之取魚置池中稍稍以

食其雛若殺其子則一村致旱災 遊齋閒覽鶴有長
水石故能於巢中養魚而水不涸 博物志鶴水鳥也
俯鳴則陰仰鳴則晴伏卵時數入水卵冷則不暇取礬
石周繞卵以助燥氣故方術家以鶴巢中礬石為真物
也 格物總論鶴狀類於鵠但赤脚無朱頂巢於高木
絕頂處善飛搏其飛也奮於層霄之上落處不知其幾
千里仰天號鳴必將有雨 埤雅鶴知雨者也巢傍為
池以石宿水今人謂之鵠石飛則將之 酉陽雜俎江

淮謂羣鸛旋飛為鸛井鸛亦好旋飛必有風雨人探巢
取鸛子六十里早能羣飛薄霄激雨雨為之散 戒菴

漫筆鸛稱老鸛鳴曰彈

平聲牙

北夢瑣言南方有鸛食

蛇每遇巨石知其下有蛇即於石前如道士禹步其石
助然而轉因得而噉里人學其法者伺其養雛緣樹以
蔑絙縛其巢鸛必作法而解之乃鋪沙樹底俾足跡所
印而倣學之 拾遺記聚鸛鳥以禳火災鸛能巢於水
上也 酉陽雜俎鸛影抱 自然論鸛影接而懷卵

禽經鸛生三子一為鸛 崔經崔得鳳之額曰羽霸

本草陶弘景云鸛有二種似鵠巢樹者為白鸛黑色曲頸者為烏鸛 清異錄鸛多在殿閣鴟尾及人家屋獸作窠故或有呼瓦亭仙者 通雅負釜鸛也一名阜裙阜裙或作阜君廣雅作阜帔陳無功引作阜羣負釜作負金喜負日而飛日色如金故名負金也 玄池說林周弘直子思方幼時於林下見一鸛為彈所傷取歸養之俟其愈縱去後數日夜讀書聞一物擊其扉啟視之

乃前縱之鶴也背負金一串卸于地串上結紙條上書
云始於博士終於大夫後果然故呼鶴為負金

雞

總論 春秋運斗樞玉衡星散為雞遠雅頌著倡優則

雄雞五足 方言雞陳楚宋魏之間謂之鷩音鷩避祇桂

林之中謂之割雞或曰鷩音北燕朝鮮洌水之間謂伏

雞曰抱房奧反江東呼甚央富反爵子及雞雛皆謂之鷩格邁反關西曰鷩音

顧其卵伏而未孚始化謂之涅爾雅邢昺疏雞者知

時畜其大者名蜀郭云今蜀雞蜀之雛子名雛雛之稍
長未成雞者名健韓詩外傳田饒告魯哀公曰夫雞
頭戴冠者文也足傳距者武也敵在前敢鬪者勇也見
食相呼者仁也守夜不失時者信也雞有五德也汲

冢周書大寒雞始乳春秋說題辭雞為積陽南方之

象

雞為日積陽之象也

火陽精物炎上故陽出雞鳴以類感也

日將

出預喜於類見而鳴也

漢五行志京房易傳曰雞知時劉向云

雞者小畜主司時起居人注至時而鳴以為人起居之

節 九家易風應節而變變不失時雞時至而鳴與風相應也二九十八主風精為雞故雞十八日剖而成雛二九順陽厯故雞知時而鳴也 寇宗奭曰巽為雞為風雞鳴於五更者時將至巽位感動其氣而鳴也 物類相感志野雞屬陰先鳴而後鼓翼家雞屬陽先鼓翼而後鳴 禽經雞見同類拊翅鳴 戒菴漫筆雞啼早則晴晏則雨上宿亦然 草木子南陽府廉訪僉事保保巡按至彼忽初更聞雞啼曰此荒雞也不久此地當

為丘墟天下其將亂乎遂棄官而隱後南陽果陷蓋初
更啼即為荒雞余謂凡雞夜鳴不時皆謂之荒祖述之
聞在於中夜不特初更乃有茲稱 鴻書雞或乙丙夜
輒鳴者俗謂之盜啼云行且有赦故後魏北齊南宮大
赦於殿門外建金雞衆皆不識其義問於司馬膺之對
曰海中日占云天雞星動為有赦帝王以為候至今為
然亦曰盜啼為有火 風俗通雞本朱氏翁所化故呼
朱朱 博物志祝雞翁喜養雞故世人呼雞曰祝祝起

此也 禽經注淮南諺曰雞寒上樹鴨寒下水驗之皆不然有一嫗曰雞寒上距鴨寒下觜上距謂縮一足下嘴謂藏其喙於翼間 廣博物志雞鶩聞磨聲則曠

小史集雅 雞好邪視 頤生論雞無髓 爾雅雞棲於

弋為櫟鑿垣而棲為埒郭注今寒鄉穿牆棲雞 禽經

雞鶩惡其類注雞與山鵲惡其類相值則相搏 左傳

季郈之雞鬪季氏介其雞郈氏為之金距 列子紀消

子為周宣王養鬪雞十日而問雞可鬪已乎曰未也方

虛驕而恃氣十日又問曰未也猶應影嚮十日又問曰
未也猶疾視而盛氣十日又問曰幾矣雞雖有鳴者已
無變矣望之似木雞矣其德全矣異雞無敢應者反走
耳 莊子羊溝之雞三歲為株株魁帥也視之非良雞也然

而數勝者以狸膏塗其頭

雞畏狸也

吳時外國傳扶南王

范尋以鐵為鬪雞假距與諸將賭戲 陳鴻祖東城父

老傳玄宗在藩邸時樂民間清明節鬪雞戲及即位治

雞坊於兩宮間索長安雄雞金毫鐵距高冠昂尾千數

養於雞坊選六軍小兒五百人使馴擾教飼諸王世家
外戚貴主侯家傾帑破產市雞以償雞值都中男女以
弄雞為事貧者弄假雞淮南子善學者如齊王之食
雞必食其跖數千而後足龍魚河圖玄雞白頭食之
病人有六趾殺人四距五色竝殺人也晉書符朗善
知味會稽王道子殺雞以食之既進朗曰此雞棲常半
露檢之驗焉本草烏雞主補中演繁露雞林本雞
種也高麗不烹雞云如烹則家有禍北戶錄邕之南

有雞卵卜又除夜及將發船皆殺雞擇骨為卜雞卜法
用雞一狗一生祝訖即殺雞狗煮熟祭之獨取雞兩眼
骨上有孔裂似人物形則吉 珍珠船真雞師凡有病

者來告即把一雞往乃持呪呵其雞令入病者之所雞
入而死病者即差雞生則病者不起時號雞師 荆楚
歲時記元日先於庭前爆竹帖畫雞於戶上亦有挂雞
於戶懸葦炭於其上樹桃其傍則鬼畏之 山堂肆考
萬州城南有道士年九十九自言交趾人因渡海船壞

結菴於此養一雞大如倒挂子日置枕中啼即夢覺

別名 曲禮凡祭祀之禮雞曰翰音注翰長也 古今

注雞一名燭夜 御覽陶弘景云裴真君好養白雞名

白精學道之士或居山林此可以辟邪 本草經載丹

丹雞也 北史齊童謠云中興寺內白鳧翁鳧翁謂雄

雞 袁淑雞九錫文咨爾浚雞山子今以君為使持節

金州西蠻校尉西河太守以揚州之會稽封君為會稽

公 御史臺記 大學博士姓張昌宗之族叔精五經博

於時事畜一雞呼為勃公子愛之不已清異錄武宗
十玩圖雞曰長鳴都尉東坡志林僧家謂雞為鑽籬
菜

詳類廣志雞有胡髯五指金駁反翅之種大者蜀小
者荆白雞金駁者美并州所獻吳中送長鳴雞長倍於
常雞永昌郡無雞埤雅雞有蜀魯荆越諸種越雞小
蜀雞大魯雞又其大者莊子曰越雞不能伏鵠卵魯雞
固能矣成玄英曰越雞荆雞也魯雞今之蜀雞按韓子

曰魯雞之不期蜀雞之不支則玄英所謂魯雞今之蜀雞非是爾雅雞三尺為鶡注陽溝巨鶡古之名雞

天中記狼盲之雞特稟異聲

狼盲地名

西京雜記成帝時

交趾越雋獻長鳴雞伺晨雞即下漏驗之晷刻無差雞長鳴則一食頃不絕長距善鬪拾遺記魏建安三年胥徒國獻沉明石雞色如丹大如燕常在地中應時而鳴聲能徹遠其國聞鳴乃殺牲以祀之當鳴處掘地則得此雞若天下太平翔飛頡頏以為嘉瑞亦謂寶雞其

國無雞犬聽地中候晷刻道家云昔仙人桐君採石入穴數里得丹石雞舂碎為藥服之者令人有聲氣後天而死 吳錄魏文帝遣使求長鳴短鳴雞羣臣以非禮欲不與孫權勅付之 江表傳南郡獻長鳴承露雞 魏志馬韓國出細尾雞其尾皆五尺餘朝鮮有長尾雞尾細而長三尺 輿地志愛州移風縣有潮雞鳴長且清如吹角每潮至則鳴一名林雞其冠四開如芙蓉 述異記伺潮雞潮水上則鳴孫綽海賦石雞清響而應

潮是也 天中記司夜雞隨鼓節而鳴不息從夜至晚
一更為一聲五更為五聲亦曰五時雞 洞冥記遠飛
雞夕還依人曉則絕飛四海外朝往夕還祝雞公善養
雞得遠飛雞之卵伏之名曰翻明雞如鵠大紫色有翼
翼下有目亦曰目羽雞 南越志高興縣多容雞其形
似雞而五采至則年穰 臨海異物志杉雞黃冠青綫
常在杉樹下頭上有長黃毛如冠頭及頸正青如垂綫
格物總論竹雞比鷓鴣差小毛羽褐多斑赤紋自呼

泥滑滑所在山谷有之 鳥獸考白蟻聞竹雞之聲化

為水 集異志漢太初二年大月氏國貢雙頭雞四足

一尾鳴則俱鳴一名喧雞武帝置甘泉故館更以餘雞

配之得種類而不能鳴 後魏書正始元年夏典事史

元顯獻四足四翼雞 白澤圖雞有四距重翼者龍也

殺之震死 本草英雞如雉尾短腹下毛赤體長熱飛

翔不遂生於澤州常食碎石英故名 楚詞注鷓鴣雞似

鶴黃白色 瀛涯勝覽三佛齊國出火雞大如鶴身圓

而頸更長頸中有二紅軟冠狀如紅褐嘴尖渾身毛如羊毛稀長青色腳長鐵黑其爪甚利或爪破人腹脹出即死好食麩炭因名火雞用杖捶碎打不能死鳥獸續考火雞出滿剌加山谷大如鸛多紫赤色能食火吐氣亦烟燄也子如鶩胎殼厚踰重錢或斑或白島夷採為飲琰見者多珍奇之檀道鸞晉陽秋安帝義熙元年云都高山有金雞青黃色飛集岩谷間朱輔溪蠻叢笑金雞羽族似雉者金項火背斑尾揚翹志意揭驕

籠之不能馴 彙苑詳註羅浮山有碧雞羣飛於絕巘
或獨鳴於空林可見不可取 瀛涯勝覽祖法兒國有
山駝雞匾頸雞身如鶴長三四尺脚二指毛如駝行亦
如駝故喚駝雞 費信星槎錄竹步國阿丹國俱出駝
蹄雞 五雜組閩中稅監高寀常求異物於海舶以進
御有番雞高五尺許白色黑文狀如鸕雞但不聞其鳴
耳萬厯間京師市上有鳥大如鷓鴣毛色淺黃足五指
有細鱗如龜狀名曰沙雞云是塞外至者其味亦似山

雉 事物紺珠沙雞又名鷓名冠雉大如鴿形如雌雉
鼠脚無後趾歧尾性慙急羣飛沙漠花雞似小雌雞秋
日來自海東大者名麻雞皇雞身文采似鳬冀州謂之
澤時馬雞背脚紅羽青綠海雞毛如家雞足似鰲

異雞 瑞應圖玉雞瑞氣也王者至孝合神明則至

神異經扶桑山有玉雞玉雞鳴則金雞鳴金雞鳴則石
雞鳴石雞鳴則天下之雞悉鳴而潮水應之矣 三秦

記太白山南有陳倉山山有石與雞不別趙高燒山雞

飛出晨鳴山頭聲聞三十里或謂是玉雞 白六帖秦
時陳倉見二寶雞化為童子或云得雄者王得雌者霸
穆公獵獲得雌者遂霸西戎立祠神光從東方來如雄
雞之聲 列異記南康雩都縣跨江南出去縣三里名
夢口有穴狀如石室舊傳嘗有神雞色如好金出此穴
中奮翼廻翔長鳴響徹見之輒走入穴中因號此石為
雞石昔有人耕此山側望見雞出遊戲有一長人操彈
彈之雞遙見便飛入穴彈丸正著穴上石徑六尺許下

垂蔽穴猶有間隙不復容人 搜神記漢宣帝黃龍元
年未央殿輅轅中雌雞化為雄毛衣變化而不鳴不將
無距元帝初元元年丞相府史家雌雞伏子漸化為雄
冠距鳴將至永光中有獻雄雞生角者 幽明錄晉兗
州刺史宋處宗嘗買一長鳴雞愛養甚至恒籠置窓間
雞遂作人語與處宗談論極有玄致終日不輟處宗因
此玄功大進 甄異記徐州人吳清以太元五年差征
殺雞求福置頭盤中忽然而鳴後得賊帥邵寶首以功

拜清河太守越自行伍猥蒙榮位雞之妖更為祥異
聞集汴人張琦家有女子入夜哀痛白日即安已經年
歲王勣至其家停宿聞女子聲開鏡照之痛者曰戴冠
郎被殺其痛者牀下有雄雞死矣乃是主人七八歲
老雞 草木子元至正甲午乙未年龍泉縣人家有一
雞二形一邊毛羽純雄一邊毛羽純雌既能雄鳴又解
雌伏蓋氣之乖亂羽蟲之孽也次年青田山賊陷縣治
雞子周處風土記正旦當吞生雞子一枚謂之練形

葛洪練化篇正月吞雞子赤豆各七枚辟瘟氣抱

朴子游涉大川者當於水次破雞子一枚以少許粉雜
香末合攪器中水以自洗濯則不畏風波蛟龍也 玉

燭寶典寒食節城市尤多鬪雞卵之戲古之豪家食稱
畫卵今代猶以卵染藍茜雜色仍加雕鏤遞相餉遺

唐書清明進新綵雞子 北戶錄邕州之南有善行術

者取雞卵墨畫祝而煮之剖為二片以驗其黃然後決
嫌疑定禍福言如響答據此乃古法也神仙傳曰人有

病就茅君請福煮雞子十枚以內帳中須臾茅君擲出中無黃者病多愈有黃者不愈常以此為候 晉書戴逵總角時以雞卵汁溲白瓦屑作鄭玄碑又為文而自鐫之 南史齊褚澄善醫術為吳郡太守百姓李道彥有冷疾五年衆醫不差澄為診脉曰汝病非冷非熱是食白蔞雞子過多所致令取蘇一升煮服之始一服乃吐出一物如痰涎裏之動開看是雞雛羽翅爪距具足能行走澄曰此未盡更服所餘藥又吐得如向者雞十

三頭而病都差 冥報記周武帝好食雞卵拔虎為監
膳儀同開皇中死而復蘇云被攝證武帝白團事左右
曰名雞卵為白團也

鷺

總論 格物總論鷺有蒼白二色綠眼黃喙紅掌按爾
雅一名舒雁一名鳴善鬬好啖蛇多溪毒處養此以辟
之或者又云鷺不食生蟲今本草言鷺子亦噉蚯蚓輩
可知已 埤雅鷺類如瘤今鷺江東呼鳴長脰善鳴又

善轉旋其項古之學書者法以動腕羲之好鶩者以此
清異錄世呼鶩為兀地奴謂其行步盤跚耳 古今
注鶩善鬬好啖蛇 禽經鶩見異類差翅鳴 物理論
鶩飛則蜮沉 埤雅卞子曰鶩性頑而傲蓋鶩戕首似
傲也 酉陽雜俎衛公言鶩警鬼 禽經鶩睨月注伏
卵則向月取其氣助卵也 聞見錄李先主以國用不
足稅民間鶩卵出雙子者 酉陽雜俎濟南有鶩浦有
漁人居水側常聽鶩聲衆中有鈴聲甚清亮候之見一

鷺咽頸極長羅得之項有銅鈴綴以銀鎖隱起元鼎元年字 嶺南異物志南道酋豪多選鷺之細毛夾以白布絮而為被復縱橫衲之其溫柔不下於挾纊也俗云鷺毛柔煖而性冷宜覆嬰兒辟驚癇也 秦記苻朗食

鷺知黑白之處人不信既而試之果然 抱朴子吳景

帝有疾召覲視之得一人欲試之乃殺鷺而埋於苑中深小屋施牀几以婦人徒服物著其上乃使覲視之告曰若能說此家中鬼婦人形狀者加賞而即信矣竟日

無言帝推問之急乃曰實不見有鬼但見一頭白鷺立墓上所以不即白然則鷺死亦有鬼也 明興雜記太祖幼時嘗見羣鷺遊於庭戲以青白二紙旗左右豎立命之曰青者立青旗下白者立白旗下違者死羣鷺應聲如命而往獨一花鷺不知所適往來於青白之間上殺而食之

詳類 洞冥記有喜日鷺至日出時銜翅而舞名曰舞

日鷺 廣志駕鷺野鷺也

爾雅疏鷓鴣

音六

野鷺別

名 物類相感志鴻鵠生鬱夷國鵠色似鴻形又似禿
鵠腹無腸羽翮附骨而生無皮肉若雌雄相盼則孕產
也 陸游入蜀記潛軍港有水禽雙浮江中色白類鵠
而大楚人謂之天鵠飛騫絕高有弋得者味甚美或曰
即鵠也 幽明錄晉義熙中羗主姚畧壞洛陽陰溝取
磚得一雙雄鵠竝金色交頸長鳴聲聞於九臯養之此
溝 沈充鵠賦序太康中得太蒼鵠從喙至足四尺有
九寸體色豐麗鳴聲驚人 仙傳拾遺山陰道士管霄

霞求王羲之寫道德經舉紅鷺一雙相贈而去後鷺冲
霄飛去 天中記京下劉光祿養好鷺劉後軍從京師
還鎮尋陽以一隻鷺為後軍別純蒼色頸長四尺許頭
似龍此一隻鷺可堪五萬自後不復見有此類

鷺異 晉書晉永嘉元年二月洛陽東北步廣里地陷
有蒼鷺白鷺出蒼者飛翔冲天白者止焉此羽蟲之孽
又黑白祥也 稽神錄乙卯歲海陵郡西村中有二鷺
鬬於空中久乃墮地其大可五六尺雙足如驢蹄村人

殺而食之者皆卒明年兵陷海陵 孔六帖中和四年
臨淮漣水民家鷹化為鷲而弗能遊

附見 後漢志海昏侯沈戎卒葬於烏程之金鷲山上
有金鷲飛集三鳴而去其後沈氏通顯諺云金鷲鳴沈
氏興 山堂肆考雙牙山在城都府簡縣東山頂有古
井山半有石箱昔有兩金鷲浴於井夜棲於箱人欲捕
之遂飛上南山化為雙石對峙若齒牙然 北史隋堯
君素守河東時圍甚急行李斷絕乃為木鷲置表於頸

具論時勢浮之黃河達於東都

鴨

埤雅鶩一名鴨蓋自呼其名曰鴨也曲禮庶人之摯匹
匹鶩也鶩不散遷而又乘匹不妒故或謂之匹也 格
物總論鴨家鶩也雄者綠頭文翅紅脚或蒼脚雌者遍
身黃色又有純白者皆自呼其名但雄者其聲小一名
舒鳧 清異錄御史符昭遠曰鴨頗類乎鶩但足短耳
謂之減脚鶩 天中記蜀廣安有金羹玉飯紅腊紫黎

金羹謂鴨也

瑣碎錄方君云養鴨者每年五月五日

不得放棲只喂乾食不得與水吃則日日生卵不然或
生或不生予家用此法生卵未有一日缺一法以土硫
黃拌穀飼之易肥 物類相感志雞驚伏卵忌磨若聞
礮磨之聲則不生矣 留青日札廣東湯燭鴨卵出雛
浙江火焙鴨卵出雛皆異 天中記李遠為杭州刺史
嗜啗綠頭鴨貴客經過無他饋餉相厚者乃綠頭鴨一
對而已 洞冥記玄都翠水中有升葉鴨赤色每止於

芙蓉上不食五穀唯啣葉上垂露因名垂露鴨一名丹
毛鳧 事物紺珠鳳頭鴨頂有高毛白毛烏骨 金樓
子海鴨大如常鴨斑白文亦謂之文鴨 洞冥記帝昇

望月臺時暝望南端有三青鴨羣飛俄而止於臺上帝
悅之至夕鴨宿於臺端化為三小童皆著青綃文襦

異苑元嘉中章安有人啖鴨肉乃成瘕病胸滿面赤不
得飲食醫令服秫米瀦須臾吐一鴨雛 四十家小說
政和間川人楊傑朝散知齊之長清縣其家鴨卵破之

得一物長寸餘如人形作男女相屈一足眉目口鼻手足胷腹悉具被髮垂頸乃腊之既枯而脇骨莖莖皆隱起與人無異亦怪矣

格致鏡原卷八十

欽定四庫全書

格致鏡原卷八十一

大學士陳元龍撰

鳥類五

鷓鴣

本草鷓鴣一名鬼車一名車載板一名九頭鳥晦暝則
飛鳴能入人室收人魂氣俗云十首一被犬噬今猶帶
血血滴人家必凶聞其鳴必捩犬應之以其畏犬也

唐韻注鷓鴣一身九頭九尾逆毛一名鷓鴣辰一名錯落

白澤圖蒼鷖九首

明崇儼厭勝書鬼車九首妖怪

之魁凡所遭觸滅身破家故一名九羅

一作九閻羅

其掌之

曰天血使者

韓詩外傳孔子與子夏渡江見鳥而異

之人莫能名孔子曰鷖嘗聞河上人歌云鷖兮鷖兮逆

毛衰兮一身九尾長兮

田家雜占鬼車鳥即是九頭

蟲夜聽其聲出入以卜晴雨自北而南謂之出窠主雨

自南而北謂之歸窠主晴古詩云月黑夜深聞鬼車

揚慎外集鬼車白澤圖謂之蒼鷖帝鷖書謂之逆鷖夫

子子夏見而歌之裴瑜注爾雅言鵠麋鵠是九頭鳥也
小說周公居東周惡聞此鳥命庭氏射之血其一首餘
猶九首按夫子鵠歌曰逆毛鵠兮一身九尾長兮只言
九尾不言九頭 夷堅志淳熙初李壽翁守長沙惡鬼
車中夜鳴噪募得之身圓如箕十脰環簇其九有頭其
一獨缺而鮮血點滴一脰各生兩翅當飛時十八翼霍
霍而動亦有所向不同更相爭拗用力競進而翅翮有
傷折者類野狐而黑背長洛中呼為渠逸鳥 續博物

志郝氏夜祀佛鬼車乘燭光而下翼廣丈餘九首互相
低昂其家呼犬持杖逐之墜一羽長三尺許廣八九寸
色類鷺鴈 隋五行志齊孝昭即位之後有鳥止於後
園其色赤形似鴨而有九頭皆鳴 彙苑詳註皇明正
德末有鳥一身九頭棲林中晝夜哀鳴聞者厭之間有
得者重一斤四兩烹食亦無所害

姑獲

玄中記姑獲一名天帝少女一名隱飛一名夜行遊女

本草姑獲能收人魂魄一名乳母鳥俗言產婦死所
化也能取人之子以為己子胷前有兩乳 荆楚歲時
記姑獲一名鉤星衣毛為飛鳥脫毛為女人或謂左傳
鳥鳴於亳社周官庭氏所射正此鳥也 酉陽雜俎夜
行遊女一曰天帝女一名鉤星夜飛晝隱如鬼神凡人
飼小兒不可露小兒衣亦不可露曬毛落衣中當為鳥
祟或以血點其衣為誌 誠齋雜記陽縣地多女鳥新
陽男子於水次得之遂與共居生二女悉衣羽而去豫

章間養兒不露其衣言是鳥落塵於兒衣中則令兒病故亦謂之飛夜遊女

鵯鵯

唐五行志鵯鵯一名訓狐 酉陽雜俎訓狐惡鳥也鳴則後竅應之 爾雅疏鵯一名鷦鷯今江東呼鵯鵯為鷦鷯亦謂之鵯鵯 本草鉤鵯入城城空入宅宅空怪鳥也常在一處則無若聞其聲如笑者宜速去之鳥似鵯有角夜飛晝伏 博物志鵯鵯一名鷦鷯晝日無所

見夜則目至明人截爪甲棄露地此鳥夜至人家拾取
爪分別視之則知有吉凶凶者輒便鳴於屋上其家有
殃 萬畢術鵒鵒致鳥取鵒鵒折其大羽絆其兩足以
為媒張羅其旁鳥聚矣 合璧事類鵒鵒夜飛晝藏或
好拾人爪甲故人除爪甲埋之戶內蓋忌此也 感應
經或云鵒鵒食人遺爪非也蓋鵒鵒夜能拾蚤蝨耳爪
蚤聲相近故誤云也 埤雅釋鳥云鵒鵒怪鵒是也其
鳴即雨為鵒可以聚諸鳥一名隻狐晝無所見夜即飛

噉蚊蟲莊子所謂鷦鷯夜撮蚤察毫末晝出瞋目而不見丘山者 正字通鷽鷽怪鳥大如鷹黃黑斑色頭目如貓有毛角兩耳晝伏夜出鳴則雌雄相喚聲如老人初若呼後若笑所至多不詳一名鉤鷽蜀人呼轂轆鳥楚人名為呼夸鷽皆因其聲似也或又譌鉤鷽為鬼各哥又一種大如雉鷽毛色似鷽頭目亦似貓鳴則後竅應之其聲連轉如休留休留故名鷽鷽江東呼車載板蜀人呼春哥兒

鷓鴣

春秋運斗樞玉衡星散為鷓鴣 爾雅注茅鷓鴣一名狂今

鷓鴣也似鷹而白又怪鷓鴣即鷓鴣又土梟一名鷓鴣 酉

陽雜俎相傳鷓鴣生三子一為鷓鴣肅宗張皇后專權每進

酒常以鷓鴣腦和酒令人久醉健忘 談苑鷓鴣生三子內

一子則鷓鴣也然鷓鴣多生兩子也 酉陽雜俎世俗相傳

鷓鴣不飲泉及井水唯遇雨濡翮方得水飲 廣博物志

鷓鴣畫眉 因話錄天寶時上皇數登勤政樓每來鷓鴣必

集樓上號隨駕老鵠

梟

陸璣詩疏離梟也自關而西謂梟為流離其子適長大還食其母故張奐云鵠鵠食母許慎云梟不孝鳥是也張華禽經注梟在巢母哺之羽翼成啄母目翔去也感應經鵠梟食母眼睛乃能飛郊祀志鵠梟羣翔師古注梟土梟也埤雅梟食母故日至捕梟磔之釋鳥曰梟鵠土梟也西方之書曰如土梟等附塊為兒

山堂肆考梟一名鷗鷯一名鷗鷯吳人呼為魑魂

劉晝新編炎州有鳥其名曰梟嫗伏其子百日而長羽翼既成食母而飛清異錄厭勝章言梟乃天毒所產見聞者必罹殃禍急向梟連唾十三口然後靜坐存北斗一時許可禳張華感應類從志甌瓦之契投梟自止嶺表錄異北方梟人家以為怪其惡之南中晝夜飛鳴與鳥鵲無異桂林人羅取生鬻之家家養使捕鼠以為勝狸格物總論梟聲惡當盛午目不見物夜則

飛行入人家捕鼠古人重其炙肥而美 五雜組貓頭
鳥即梟也閩人最忌之云是城隍攝魂使者城市屋上
有梟夜鳴必主死喪然近山深林中亦習聞之不復驗
矣好事者伺其常鳴之所懸巨炮枝上以長藥線引之
夜然其線梟即熟視良久炮震而墮地矣此物夜拾蚤
虱而晝不見丘山陰賊之性即其形亦自可惡也古以
午日賜梟羹又標其首以木故標賊首謂之梟首

鵙

禽經怪鵬塞耳注江東呼為怪鳥聞之多禍人惡之掩
塞耳矣 西京雜記誼在長沙鵬鳥集其承塵而鳴長
沙俗以為鵬至人家主人當死誼因作鵬鳥賦 巴蜀
異物志有鳥小如雞體有文色土俗因形名之曰鵬不
能遠飛行不出域 山堂肆考鵬不祥鳥也能為惡聲
詩疏鴉大如斑鳩綠色惡聲之鳥也入人家凶賈誼
所賦鵬鳥是也其肉甚美可為羹臠又可為炙漢供御
物各隨其時惟鴉冬夏常施之以其美故也 盛弘之

荊州記巫縣有鳥如雌雞其名爲鴝楚人謂之服 廣
志鴝楚鳩所生如驢巨虛種類不孳乳也 埤雅鴝禍
鳥也今謂之畫鳥蓋聲之誤也 本草鴝一名黃禍侯
聲如小兒吹竽 本草鴝目無毒吞之令人夜中見物
丘光庭兼明書孔穎達曰鴝鴝巧婦似黃雀而小其
喙尖如錐明曰穎達之妄也按郭璞注爾雅云鸛鳩鴝
之類也魯頌曰翩彼飛鸛集於泮林毛萇傳曰鴝惡聲
鳥也又賈誼鵬鳥賦序曰鵬似鴝不祥鳥也又弔屈原

賦曰鸞鳳伏竄兮鷦鷯翔翔顏師古注曰鷦鷯怪鳥也鷽惡聲鳥也據毛萇郭璞顏師古諸儒之說則鷽鷽土梟之類非巧婦矣郭璞抱鷽贊抱鷽貪恡其目在腋圖形似鼎是謂不若

鷽

廣雅鷽鳥其雄謂之運日其雌謂之陰諧樂史寰宇記鷽一名曇鳥亦曰同力鳥尾有綵文背上連錢文足三趾雄者其鳴先顧廣博物志鷽鳥一名雲白抱朴

子云渴者恣口於雲白之酒 天中記淮南子云暉日
知晏陰諧知雨天晏靜無雲則運日先鳴天將陰雨陰
諧則鳴 物類相感志廣志曰鵠似鷹而大如鴉毛紫
黑色有毒食之殺人喙長七八寸黃赤如銅食蝮蛇及
橡栗蛇入口則爛屎溺著石石爛如泥屎石則變為生
金及雄黃其鳥有法知巨石大樹間有蛇虺即為禹步
以禁之進退俯仰有度或獨為或結羣逡巡石樹為之
崩倒取蛇虺時呼同力數十聲石起蛇出皆啄食之有

人入山見其步法歸向其妻學之婦正織而機翻倒凡
鴝飲水處百鳥吸之皆死或得犀牛蘸角其中則水無
毒此鳥與犀二物相伏今有犀處必有鴝鴝生處必有
犀不然有毒氣傷物類故天資之以含育萬物 晉書

石崇為荊州刺史得鴝鳥雛以與后軍將軍王愷而養
之其大如鶩喙長尺餘純食蛇虺時制鴝鳥不得過江
為其羽入酒中必殺人司隸校尉傅祗所糾詔原之燒
鴝於都街遜齋間覽蘄州黃梅山有鴝巢於山岩大

木中巢下數十步無生草每春生一子能飛即送出山
惟二雌雄獨留 楊鐵崖集鳩狀類訓孤聲如擊腰鼓
巢木顛巢下數十步草木不生 七修類稿鳩毒鳥也
鷓鴣形大如鷓鴣毛紫綠色范成大曰聞邕州朝天鋪及山
深處有之亦曰如鷓鴣大黑身赤目音如羯鼓遇蛇則鳴
聲邦邦然啄蛇食之秋冬之間脫羽人以銀爪拾取著
銀餅中否則手爛墮以之瀝酒飲人即死也所謂鳩酒
今以為鶴頂紅毛非也爾雅翼曰矢石即變為雄黃今

諸書云雄黃治蛇毒有由然也 正字通本草陶弘景
謂鳩與鴝日為二種鳩如孔雀鴝日如黑鶩鷄作聲似
云同力江東呼同力鳥按今交廣人皆云鴝日即鳩更
無如孔雀者陶氏說誤

諸鳥

周書蜀人以文翰文翰若臯雞注鳥之有文采者臯雞
冀州人謂之澤特 山海經有五采之禽有冠名曰狂
鳥 爾雅云狂夢 有五采之禽仰天 張口 名曰鳴鳥爰有
鳥即此也

百樂歌儻之風有五彩之鳥飛蔽一鄉名曰翳衝波
傳子路顏淵浴於洙水見五色鳥顏淵問子路曰熒熒
之鳥後又浴於泗水更見前鳥復問子路曰同同之鳥
顏回曰何一鳥而二名子路曰譬如綵絹煮之則為帛
染之則為阜一鳥二名不亦宜乎 異物志錦鳥文章
如丹地錦而蓼績采文人見其端正似錦因謂之錦鳥
解醒語元世祖獵於灤河一鳥摩於青雲之表世祖
以矰下之形大於鶴羽皆五彩成斑有西夷人云此是

盧隆鳥宿於西海荻草中 九國志東漢劉贊鎮彭城
之二年有鳥集蘇碧堂庭樹上黃質朱喙金目青翼紺
趾玄尾頗類於鳳 異苑蘭陵昌慮縣郢城有華山山
上有井有鳥巢其中金翅黑色見則必大水 廣州記
金鳥色純白口與足如金其鳴自呼 嶺表錄異帶箭
鳥鳴如野鵲翅羽黃綠間錯尾生兩岐長二尺餘直而
不梟唯尾梢有毛宛如箭羽因目之為帶箭鳥 太平
清話朱衣鳥出山西澤州形如瓦雀毛羽類丹砂善鳴

竟日不輟即古之赤鷁也 七修類藁落霞乃鳥也余
舊嘗於內臣養戶處見之形如鶯哥少大遍體緋羽螢
雪叢說以為飛蛾誤矣 事物紺珠我師禽出太和山
褐衣金喙青首紅足良夜高峯深林中嗚呼我師終夜
不止 九華山志雲韶部俗名音聲鳥有二種形如練
鵲毛具五色喙紅足碧一種畧小羽間玄黃或青或紅
多居高峯絕巘之間面陽而巢飛翔有序羣族必單暮
春早秋時一見之風輕烟暖聲響互發如聆簫韶也

雨航雜錄雁山五珍有山樂官似金雀聲如簫管 事
物紺珠半部樂形如黃雀數十為羣音中宮商有如鼓
瑟吟唱出太和 拾遺記黃龍元年始都武昌時越雋
之南獻背明鳥形如鶴止不向明巢常對北多肉少毛
聲音百變聞鐘磬笙竽之聲則奮翅搖頭 山堂肆考
五臺山有吉祥鳥形翅甚大其飛也有四黃鳥導之四
鵲從之 中朝故事驪山多飛鳥名阿濫堆明皇採其
聲為曲子又作鷓鴣堆 酉陽雜俎鷓鴣堆黃一變之

鵲色如鶯髦鵲轉之後乃至累變臆前漸漸微白 九

華山志搗藥鳥形罕見春夏之間月夜獨鳴於深巖幽谷之中啼曰克丁當宛如杵臼敲戛之聲清亮可聽

事物紺珠紅尋一名搗藥鳥 廣博物志葛仙公嘗於

西峯石壁上石臼中搗藥因遺一粟許有飛禽遇而食之遂得不死至今夜靜月白風清之時其禽猶作丁當杵臼之聲名之曰搗藥鳥 九華山志念佛鳥大如鳩羽色黃褐翠碧間而成文音韻清滑如誦佛聲一名念

佛子 我眉志蜀大我峯普光殿有佛現鳥狀如鵲鴝
飛鳴近人其聲圓轉山僧名為佛現鳥 陸深蜀都雜
抄陝西黃臣言曩為川轄時親登我眉觀佛光光未發
時有鳥先飛過若言施主發心菩薩來到光既散復來
作聲施主布施菩薩去了又拾藏山中白石大小皆六
稜照耀有光采疑光怪即此石所為也近余承勛亦言
兩宿其上登絕頂亦見光具五采俯視在雲壑中其言
白石與黃同唯云鳥聲只三字若言佛現了其鳥類雀

而稍大只有三枚別無種類三鳥飛入佛殿中常就僧食但不見有長育耳 廣博物志婆利國有鳥名舍利解人語 杜陽雜編建中二年南方貢朱來鳥形有類於戴勝而紅觜紺尾尾長於身巧解人語善別人意其音清響聞於庭外數百步宮中多所憐愛常為玉屑和香稻以啗之則其聲益加寥亮夜則棲於金籠晝則飛翔於庭廡而俊鷹大鶻不敢近 杜陽雜編處士元藏機有二鳥大小類黃鸝每翔翥空中藏機呼之即至或

令銜珠或令授人語謂之傳信鳥本出滄州 戒菴漫

筆池州九華山江南勝地山中有奇花歲發則有護花

鳥鳴焉遊人欲折者鳥則盤旋其上鳴聲云莫損花莫

損花 鳥獸續考護花鳥青城峩眉間往往有之至春

則啼其音若云無偷花果髣髴人言云 海錄碎事惜

春鳥大不踰燕其聲曰莫摘花果人謂之護山雞 述

異記顧渚山有報春鳥春至則鳴秋分亦鳴似題鳩之

類也 顧渚山記顧渚山中有鳥如鷓鴣而小蒼黃色

每至正月二月作聲云春起也至三月四月作聲云春
去也採茶人呼為報春鳥 荆楚歲時記二月民竝種
有鳥如烏白羽先雞而鳴聲云架格民候此鳥則入田
以為催人架犁格也 本草李時珍曰鷦鷯謠作批頰
鳥江東曰烏白又曰鷽白三月即鳴俗呼駕犁農人以
為候五更輒鳴曰架架格格至曙乃止滇人呼榨油郎
呼鐵鷽鷽能啄鷹鷽南人呼鳳凰阜隸汴人呼夏雞
丹鉛總錄批頰鳥名即鷽鷽催明之鳥也一名夏雞俗

名隔墜雞 詩相彼鴝鳴或惡之鳴注鴝鳴求旦之鳥

方言鴝鳴

鳥似雞五色冬無毛赤
裸晝夜鳴侃旦兩音

周魏齊宋楚之間

謂之定甲或謂之獨春

好自低昂

自關而東謂之城旦

言其辛苦

有似於
罪禍者

謂之倒懸

好自懸於樹也

或謂之鳴鳴自關而西秦隴

之內謂之鶉鳴

臨海異物志獨春鳴聲似春鳴聲多

者五穀薄鳴聲少者五穀熟

庶物異名疏坊記篇注

盍旦夜鳴求陽之鳥也言盍旦欲反夜作旦求所不當

求者月令作鶉鳴或作渴旦周書時訓曰大雪之日鶉

鳴不鳴鹽鐵論作鴝旦 輟耕錄五臺山有鳥名號寒
蟲四足有肉翅不能飛其糞即五靈脂也當盛夏時文
彩絢爛乃自鳴曰鳳凰不如我至冬寒毛盡脫落自鳴
曰得過且過 廣博物志兜兜鳥其聲自號正月以後
作聲至五月節不知所在其形似鵠鵠 格物總論思
歸樂鳥狀如鳩而慘色三月則鳴陶岳零陵記云其音
云不如歸去即此 山堂肆考蠟嘴生於象山似雀而
大嘴如黃蠟色故名今吳人養此鳥能歌舞聽人曲調

則以嘴銜紙糊臉子搬演法戲移腔換套必按音節又
一種名鐵嘴 徐文長賦鳥曰黃頭猛以善鬪 韻府
春泰即黃頭鳥 潛確類書畫眉似鶯而小黃黑色其
眉如畫巧於作聲如百舌 事物紺珠珊瑚鳥大於畫
眉好鬪 山堂肆考山胡一名山呼一名珊瑚出嶺南
巧聲之鳥 雲間郡志十姊妹名游香俗呼相思鳥性
狎其侶飛鳴不散 九華山志提壺蘆狀類燕子色錯
黃褐春日則呌曰提壺蘆沽美酒人多見之 山堂肆

考鳥有名白頭翁者形如鵲鳩其飛如燕之頡頏頭上有白毛身蒼色 事物紺珠白頭翁似脊令有三種一青白色一綠衣素襟頂毛員白如小錢愛往來花間一純黑身紅足朱喙首白 留青日札有小鳥飛鳴直入雲際翻身徑落其聲啁唧名告天子 山堂肆考告天子褐色似鶉而小生海上叢草中黎明時遇天晴霽則且飛且鳴直上雲端其聲連綿不已一云叫天子 戒菴漫筆半翅鳥倍大如鵠鶉肉味亦如之性極癡又謂

之半癡亦曰癡半斤好視紅物飛不遠輒下歇人著紅
裙襖以誘之則近身凝視不去故可得事物紺珠山
和尚似紫翠差大頭圓出嘉定州山堂肆考雨道士
鳥名亦出嘉定州爾雅鷺澤虞注姻澤鳥似水鴉蒼
黑色常在澤中見人輒鳴喚不去有象主守之官因名
云俗呼為護田鳥爾雅疏爰居海鳥也大如馬駒一
名雜縣樂動聲儀焦明至為雨備焦明水鳥也淮
南子寒將水禽也田家五行喫井水禽也在夏至前

鳴主旱 交州志鸛鷁水鳥也即越王鳥出九真交趾
大如孔雀喙長尺餘南人以為飲器 丹鉛錄鸛鷁即
今鶴頂世以此為杯 竺法真登羅山疏越王鳥狀似
鵝口勾末可受二升許南人以為酒器珍於文螺不踐
地不飲江湖不啞百草不下餌蟲魚惟噉木葉糞似薰
陸香南人遇之既以為香又治瘰癧 瀛涯勝覽舊港
國有鶴頂鳥大於鴨毛黑脰長腦骨厚寸餘內黃外紅
俱鮮麗可愛 華夷鳥獸考鵠鵠膏主耳聾滴耳中又

主刀劍令不鏽以膏塗之水鳥也如鳩鴨脚連尾不能
陸行常在水中人至即沉或擊之便起庶物異名疏
箴疵鳥也見上林賦張揖注云箴疵似魚虎而蒼黑色
鳥獸續考瀛之水有鳥曰謾畫類鳧奔走水上不問
水腐泥沙必啞啞然盡索之而後已無一息少休丹

鉛總錄信天翁鳥名滇中有之其鳥食魚而不能捕俟
魚鷹所得偶墜者拾食之李時珍本草信天緣俗名

青翰又名青莊事物紺珠鵲鵲

音精春俗
音青莊

似鷺而大

青色

松江志青鸛出數澤頗肥俗云水裏鰓岸上鸛

六書故有鳥似百舌長喙善食魚越人謂之鸛鶯

事物紺珠水鶯

音扎

雜毛出昆明池水際鸛鶯海鳥大如

鸛喙長八寸潮上即鳴聲如嘯天欲風雨內喙土中向

風海師以為候白駁如盧鸛頭如蛇頸長頂白冬月羽

毛落盡棲溪岸木上卒遇人不能去則自擲水中汨沒

如常 三蒼鸛善高飛似鴈目相擊而孕吐而生子其

毛蒼白春秋書六鸛退飛過宋都即此鳥也 禽經白

鷓相眠而孕 爾雅注烏鷓水鳥也似鷓而短頸腹翅
紫白背上綠色 爾雅顛蝨母注似烏鷓而大黃白雜
文鳴如鷓聲今江東呼為蚊母俗說此鳥常吐蚊故以
名云 嶺表錄異蚊母形如青鷓嘴大而長於池塘捕
魚而食每叫一聲則有蚊蚋飛出其口俗云採其翎為
扇可辟蚊子亦呼為吐蚊鳥 臨海異物志蜜母鳥凡
一飛舉蜜蜂輒羣隨之正月旦為蜜蜂周行諸山求可
安處蜜母入蜂中宿也 山海經發鳩之山有鳥焉其

狀如烏文首白喙赤足名曰精衛其鳴自詆是炎帝之
少女名曰女娃遊於東海溺而不返故為精衛常銜西
山之木石以堙於東海述異記左思魏都賦精衛銜
木石以填海怨溺死故也海畔俗說精衛無雄耦海燕
而生雌狀如精衛生雄狀如海燕今東海畔精衛誓
水處猶存溺於此川誓不飲其水一名誓鳥一名怨禽
又名志鳥俗名為帝女古今注楚魂鳥一名亡魂或
云楚懷王與秦昭王會於武關為秦所執囚咸陽不得

歸卒死於秦後於寒食月夜人見於楚化而為鳥名楚
魂拾遺記永平元年常山郡獻傷魂鳥狀如雞毛色
似鳳帝惡其名棄而不納復愛其毛羽當時博物者云
黃帝殺蚩尤有獬虎誤噬一婦人七日氣不絕黃帝哀
之葬以重棺石擲有鳥翔其冢上其聲自呼為傷魂則
此婦人之靈也時人疾此鳥名使常山郡國彈射驅之
至晉初改其名為相弘臨海異物志鷓鴣鳴聲哀俗
云繼母欲嫁因爨使人守之母遂不還兒因呼母言鷓

雉也 南康記歸美山有石室色如黃金號為金室有
鸚鵡鳥形色鮮潔自愛羽毛其隻者或鑒水向影悲鳴自
絕方知孤鸞對鏡為不虛矣 彙苑詳註思婦鳥名昔
有人思婦登此山絕望愁忿而死故以為名 廣陵異
物志木客鳥大如雀數千百頭為羣飛集有度不與衆
鳥相廁俗云木客化也白黃文者謂之君長左翼後有
綬飛特高而正赤者在前謂之伍伯居前正黑者謂之
鈴下綬色而頰雜者謂之功曹左脇有白帶似鞶囊者

謂之主簿長次君後其伍曹官屬各有章色土人次第
呼之凡飛不過百餘步水經注鄭玄云鳥鼠之山有
鳥焉與鼠飛行鳥名為餘似鷄而黃黑色鼠如家鼠而
短尾穿地而共處鼠內而鳥外孔安國曰共為雌雄杜
彥達曰同穴山宿養子互相哺食大乃止張晏言不相
牝牡因以名山山海經鍾山有神其子曰鼓其狀人
面而龍身是與欽鵠殺葆江於崑崙之陽葆或作祖帝乃戮
之鍾山之東曰崑崖欽鵠化為大鶚其狀如鵬而黑文

白首赤喙而虎爪其音如晨鵠見則有大兵鼓亦化為
鷦鷯狀如鷦鷯赤足而直喙黃文而白首其音如鷦鷯見則
其邑大旱 山海經青丘之山有鳥焉其狀如鷦鷯名曰
灌灌佩之不惑丑陽之山有鳥焉其狀如鳥而赤足名

曰鵠鵠

音如枳
相之枳

可以禦火嵒山有鳥狀如鷦鷯赤身白首

名曰竊脂符愚山有鳥名鷦鷯其狀如翠赤喙俱可衛火

松果山有鳥名曰鷦渠狀如山雞黑身赤足可以已膠

膠謂皮
皺起也

馬成山有鳥狀如鳥首白身青足黃名鷦鷯食

之不饑小侯山有鳥狀如鳥而白文名曰鵠鵠軒轅山
有鳥狀如梟而白首其名曰黃鳥其鳴自設食之不妬
有鳥狀如雞而鼠毛其名曰蜚鼠見則其邑大旱有鳥狀
如鳬而鼠尾善登木其名曰絜鉤見則其國多疫廩山
有鳥狀如山雞而長尾赤如丹火而青喙名曰鵠鵠服
之不昧支離之山有鳥其名曰嬰勺其狀如鵠赤足赤
目赤喙白身其尾若勺其鳴自呼董理之山有鳥其狀
如鵠青身白喙白目白尾名曰青耕可以禦疫其鳴自

叫天帝山有鳥如鷄黑文赤翁名曰鷄食之已痔

注鷄讀磔

翁音甕頸下毛也

蔓聯山有鳥羣居朋飛毛如雌雉名曰鷄其

鳴自呼食之已風英山有鳥其狀如鷄黃身而赤喙其

名曰肥遺食之已癰可以殺蟲有鳥狀如翟而赤名曰

𪚩

音遇

是食魚其音如錄見則其國大水有鳥名曰鷄

其狀如鳬青色而赤目赤尾食之宜子有鳥狀如雉而

文首白翼黃足名曰白鷄食之已瘳

瘳病也

王會圖奇翰國貢善芳頭若雄雞佩之令人不昧

韓子鳥有周周者首重而屈尾將欲飲於河則必顛乃
銜羽而飲 爾雅鴈鵠剖葦注好剖葦皮食其中蟲因

名云江東呼蘆虎似雀青斑長尾 說苑晉平公出朝

有鳥環平公不去平公顧謂師曠曰是鳳耶曠對曰東

方有鳥名曰端琦一作諫珂憎鳥而愛狐今吾君必衣狐裘

而朝乎平公曰然 列女傳南方有鳥名曰乾吉食其

子不擇肉子常不遂 雜俎秦中山谷間有鳥如梟色

青黃肉翅好食烟見人即驚落隱草穴中嘗露身其聲

如嬰兒啼名曰老鸛

物類相感志形雀鳥見人輒以

嘴啄石自圖畫其形容而去也

物類相感志大秦國

一名拂林國有鳥狀類鶩其毛色嫩綠在王邊倚枕上

坐每一進食有毒其鳥輒鳴者也 酉陽雜俎奇嵐鳥

出河西赤塢鎮狀如鳥而大飛翔於陣上戰多不利

事林廣記大食勿拔國每歲春未有等飛禽自天而降
不知出沒白如絲鷓大如家雀肥甚而味極佳每旦天
明即四散飛泊日出則絕不見影國人張羅殺食之惟

春暮一月有之交夏則絕 廣博物志鷓鴣鳥似雉青
身白首 紫桃軒雜綴杜少陵七歌之四曰嗚呼四歌
兮歌四奏竹林為我啼清晝竹林本鳥名同州有之色
正青如雀善啼杜老本用此後注者乃改作林猿非
說文鋪豉鳥名馱也 庶物異名疏濶章鳥名七發云
濶章白鷺孔雀鸚鵡含閨鳥似鵲鵲而色黃見經史直
音山菌子鳥名生江東山林間如小雞無尾見應菴隨
筆 事物紺珠阿鵲鳥似鳥嘴赤出合火山蝦蟆護多

在田中頭有冠色蒼足赤形如鷺迦蘭陀出西蕃形如
鵲羣棲竹林好音鵲鴉出夫容山愛形顧影不自匿為
人得鎖幅鳥羽細紫其毳織為布紋如紈綺名瑣伏十
二紅小於鵲蒼背花翅紅腹遊鳥大如鷺色黑以青絲
繫竹竿呼之即來入手俗云東海神所畜不可傷爾
雅注老鵲木兔也似鵲鵲而小兔頭有角毛脚夜飛好
食雞 楊慎外集絲鵲大如鵲俗訛為慈老 山堂肆
考黃鵲形似百舌灰黑色雀行性躁好鳴叢林間又名

漱糠鳥天將雨則鳴或云此鳥下枝傳上而鳴則晴上
枝傳下而鳴則雨 田家雜占夜間聽九霄遙鳥叫卜
風雨 事物紺珠章渠一名庸渠似鳧灰色雞脚俗呼
鶉雞水雞 五侯鯖鶉雞形似鷺金頂紅背肉味香脆
柔美甲于水陸之鳥須骨可噉食品之珍奇每來於三
月三日前去於九月九日前來則夜至羣飛之聲如雷

異鳥

神異經崑崙銅柱有鳥名希有南向張左翼覆東王公

右翼覆西王母其喙赤目黃如金其肉苦鹹仙人甘之
水經注希有背上小處無羽一萬九千里西王母歲
登翼上之東王公也 山海經王母山沃野有三青鳥
赤首黑目一名大鷲一名少鷲一名青鳥注三鳥皆西
王母所使 藝文類聚山海經曰三危之山有青鳥居
之青鳥主為西王母取食者別自棲息於此山也 酉
陽雜俎齊郡函山有鳥足青嘴赤素翼絳頰名王母使
者昔漢武帝登此山得玉函長五寸帝下山玉函忽化

為白鳥飛去世傳山上有王母藥函常令鳥守之 娜
嬛記西王母有三鳥一曰青鍾二曰鶴三曰燕子常令
三鳥送書於漢武帝也 起世經龍類有四種生卵生
胎生濕生化生亦有四種生金翅鳥食之欲搏取龍時
以兩翅扇海令開乃銜出 法華經偈頌聖主天中王
迦陵頻伽聲注迦陵頻伽妙音鳥也鳥未出殼時即發
音微妙一切天人聲皆不及唯佛音類之故以取況

釋氏書極樂國有迦陵頻伽共命之鳥晝夜六時出和

雅音注頻伽此云妙音未出殼時已有音聲超衆鳥故
共命亦云命命亦云生生梵語耆婆耆婆迦二首一身
報同識異謂是釋迦調達宿因雪山有二頭鳥一曰迦
婁啖一曰優婆迦婁啖是也 法苑珠林自炎摩天以
上悉無象馬四足衆生唯有教放逸鳥實語鳥赤水鳥
等與諸天為師若見諸天放逸即來訶責 王融曲水
序注天山有神鳥也識歌舞名曰帝江 宋書神鳥者
赤神之精也知音聲清濁和調者也雖赤色而備五彩

雞身鳴中五音肅肅雍雍喜則鳴舞樂幽隱風俗從則
至三輔黃圖飛廉神禽也能致風氣身似鹿頭如雀
有角而蛇尾文若豹焦氏筆乘飛龍鳥名鳳頭龍尾
其文五色以象五方一名飛廉一名龍雀漢銅鑄其象
以彰瑞應符子晏子曰臣聞琬琰之外有鳥焉曰金
翅民謂為羽豪其為鳥也非龍肺不食非鳳血不飲
拾遺記魏明帝時昆明國貢嗽金鳥形如雀而黃色羽
毛柔密帝畜之靈禽之園飴以真珠飲以龜腦鳥常吐

金屑如粟鑄之可以為器此鳥畏霜雪乃起小屋處之
名曰辟寒臺用水晶為戶牖使內外通光又瀛洲有鳥
如鳳身紺翼丹名藏珠每鳴翔而吐珠累斛 洞冥記

元封五年勒畢國貢細鳥以方尺之玉籠盛數百頭形
如大蠅狀似鸚鵡聲聞於數里之間如黃鵠之音也國
人常以此鳥候時亦名曰候日蟲帝置之於宮內旬日
而飛盡帝惜求之不復得明年見細鳥集帷幄或入衣
袖嬪妃皆悅之有鳥集其衣者輒蒙愛幸至漢武帝未

稍稍自死人猶愛其皮服其皮者多為丈夫所媚 宋
書同心鳥王者德及遐方四夷合同則至 瑞應圖比
翼鳥者王者德及高遠則至 爾雅注山海經云崇吾
山有鳥狀如鳬一翼一目相得乃飛名曰蠻蠻郭云比
翼鳥也色青赤不比不得飛爾雅作鵽鵽者正謂相比
也 拾遺記比翼鳥多力狀似鵽銜南海之丹泥巢崑
岑之玄木 博物志比翼鳥一青一赤在參崴山一云
結胷國有比翼鳥 水經注林邑城外香桂成林時禽

異羽翔集間闕燕比翼鳥不比不飛鳥名歸飛鳴聲自
呼 鄉嬛記南方有比翼鳥飛止飲啄不相分離雄曰
野君雌曰觀諱總名曰長離言長相離著也此鳥能通
宿命死而復生必在一處 張華禽經注一足鳥一名
商羊字統曰商羊一足鳥天將雨則飛鳴 家語齊有
一足鳥飛集殿前舒翅而跳齊人訪諸孔子孔子曰鳥
名商羊昔童兒有屈一脚振迅兩臂而跳且謠曰天將
大雨商羊鼓舞 正字通明永樂中西域進獨脚異鳥

上以問解縉對曰此名商羊左肋有肉鼓右肋有內鐘
伐鼓則舞考鐘則鳴試之果然 山海經章莪之山有

鳥焉其狀如鶴一足赤文青質而白喙名曰畢方見則

其邑有譌火

尚書故實云武帝時有獨足鶴人皆不知
以為怪異東方朔奏曰此山海經所謂畢

方鳥也驗
之果是

復州之山有鳥焉其狀如鴉而一足羴尾其

名曰跂踵見則其國大疫踰次之山有鳥焉其狀如象

人面而一足名曰橐蜚冬見夏蟄服之不畏雷 南史

陳后主時有鳥一足集其殿庭以觚畫地成文曰獨足

上高臺盛草變為灰欲知我家處朱門當水開 臨海志獨足鳥文身赤口晝伏夜飛聲如人嘯將雨則鳴

河圖鳥一足名獨立見則主勇強 山海經互人之國

有青鳥身黃赤足六首名曰鵩鳥翠山其鳥多鵩狀如鵩赤黑兩首四足可以禦火有鳥焉其狀如雞而三首六目六足三翼其名曰鵩鵩食之無臥梁渠之山有鳥焉其狀如夸父四翼一目犬尾名曰鵩其音如鵩食之已腹痛可以止衞首山有谷曰機谷多馱鳥

音如鉗
鉗之鉗其

狀如梟而三目有耳其音如錄食之已塾景山有鳥焉
其狀如虵而四翼六目三足名曰酸與其名自諛見則
其邑有恐有鳥焉其狀如鵲白身赤尾六足其名曰顛
是善驚其鳴自諛三危之山有鳥焉一首三身其狀如
鵲其名曰鵠 公羊傳其諸為其雙雙而俱至者與注
言其雙行匹至似於鳥獸疏曰舊說雙雙之鳥一身二
首尾有雌雄隨便而偶常不離散故以喻焉 集異志
咸通中吳越有異鳥極大四身三足鳴山林其聲曰羅

平占曰國有兵人相食此後荒亂相繼 酉陽雜俎大

厯八年大鳥見武功羣噪之行營將張自芬射獲之肉

翅狐首四足足有爪廣四尺狀類蝙蝠 續博物志江

浙間有飛生鳥狐首肉翅四足如獸飛而生子即隨母

後難產者以其爪置之胸腹間立效 事物紺珠松節

鳥出終南山如雀鼠尾四脚 山海經有五色之鳥人

面有髮爰有青鵞音黃鵞青鳥黃鳥其所集者其國

亡有鳥焉其狀如雌雉而人面見人則躍名曰竦斯有

鳥焉其狀如鳥人面名曰鷺鷥宵飛而晝伏食之已喑
有鳥焉其狀如鷗而人面雖身犬尾其鳴自號見則其
邑大旱禱過之山有鳥焉其狀如鷗而白首三尺人面
其名曰瞿如奇肱國之北女祭女戚國有鷺鳥人面鹿
臺之山有鳥焉其狀如雄雞而人面名曰鳧僊其名自
叫見則有兵有鳥焉其狀如鷗而人足名曰數斯食之
已癭拒山有鳥狀如鷗人手音如痺名鵠見則縣多放
士拾遺記幽州之墟羽山之北有善鳴之禽人面鳥

喙八翼一足毛色如雉行不踐地名曰青鸛其聲如鐘
磬笙等也世語曰青鸛鳴時太平故盛明之世翔鳴藪
澤音中律呂飛而不行至禹平水土棲于川岳所集之
地必有聖人出焉自上古鑄諸鼎器皆圖象其形銘贊
至今不絕杜陽編大中末舒州有鳥人面綠毛背爪
皆紺其聲曰甘蟲因謂之甘蟲時人畫圖鬻於坊市
庶物異名疏金吾顏師古云鳥名也主辟不祥職主先
導執此鳥之象因以名官詩類考金吾形似美人首尾

似魚有兩翼其性通靈不寐 神異記不孝鳥狀如人
身大毛有齒豬牙額上有文曰不孝口下有文曰不慈
背上有文曰不道左脅有文曰愛夫右脅有文曰憐婦
北史伏盧尼在波斯西北有大河南流中有鳥其形
似人亦有如橐駝馬者皆有翼常居水中出水便死

山海經有鳥焉其狀如鳥五彩而赤文名曰鵯鵯是自
為牝牡食之不疽有鳥焉其狀如雌雉而五彩以文是
自為牝牡名曰象蛇 唐韻注有鳥名鷓鴣能自為牝

壯 廣志安息國貢大雀鴈身駝蹄蒼色舉頭高七八尺張翅丈餘名曰駝鳥卵如甕 魏書波斯有大鳥形如索駝有兩翼飛而不能高食草與肉亦能噉火馳走甚疾一日能七百里 舊唐書高宗永徽中吐火羅國遣使獻大鳥高七尺其色玄足如駝有翅而能飛日行三百里能噉銅鐵夷俗呼為駝鳥上以太宗懷遠所致獻於昭陵乃刻像於陵之內 杜環經行紀大食國有駝鳥高四尺以上脚似駝蹄頭頸勝得人騎行五六里

其卵大如三升器 神異經北海有大鳥其高千里頭

文曰天雞一作雞

左翼文曰鷖右翼文曰勒左足在北海

崖右足在南海崖其毛蒼其喙赤其脚黑名曰天雞一

名鷖勒頭河東身止海北唯捕鯨魚死則北海水流不

犯觸人不干於物或時舉翼飛其兩羽切如雷風驚動

天地 拾遺記堯時祇支之國獻重明之鳥一名雙睛

言雙睛在目狀如雞鳴似鳳時解落毛羽肉翮而飛能

搏逐猛獸虎狼使妖災羣惡不能為害貽以瓊膏一歲

數來或數歲不至國人莫不灑掃門戶以望重明之集
其未至之時國人或刻木或鑄金為此鳥之狀置於門
戶之間則魑魅之類自然退伏今人每歲元日或刻木
鑄金或畫雞牖上此之遺像也 晉書趙王倫僭位殿

上有異鳥不知名有素衣小兒言服劉鳥明旦失人鳥
所在倫目有瘤時以為妖 大業拾遺煬帝征遼回次
於柳城郡之望海鎮步出觀望有大鳥二素羽丹觜狀
同鶴鷺出自霄漢翻翔雙下高一丈四五尺長八九尺

徘徊馴擾翔舞御營勅著作佐郎虞綽製瑞鳥銘以進
山海經當扈鳥出上申之山狀如雉以翬飛食之不
眴目拾遺記有鳥名鴻鵠色似鴻形如禿鶩腹內無
腸羽翮附骨而生無皮肉也雄雌相眇則生產山海
經有鳥焉其狀如雞而白首鼠足而虎爪其名曰魁雀
食人萊山有鳥名羅羅是食人朝野僉載真臘國有
葛浪山高萬丈半腹有洞先有浪鳥狀似老鴟大如駱
駝人過即攫而食之騰空而去百姓苦之真臘王取大

牛肉中安小劍子兩頭尖利令人載行鳥攫而吞之乃
死無復種矣 山海經有鳥焉其狀如蜂大如鴛鴦名
欽原蠶鳥獸則死蠶木則枯又號山其鳥多寓狀如鼠
而鳥翼其音如羊可以禦兵 鳥獸考南金山有師子
禽其毛黃赤而光鮮耳小若鳴時地動石裂也 杜陽
編唐順宗朝拘彌國貢二鳥純黑色似燕聲清厲不類
常鳥置於火中火即自散去 酉陽雜俎鸛鷀一名墮
羿形似鵲人射之則銜矢反射人 漱石閒談稀差者

南中鳥也數十年一至至期則雌雄繞樹而飛不止數日忽一接遺精在地人掘而乾之食一毫足助一夕之歡墨客揮犀河州有禽名骨托狀類鵬高三尺許以名自呼食鐵石郡守每致輒出示客或疑鐵石至堅非可食之物乃取三寸白石繫於絲繩擲其前即啄而吞之良久牽出視石已軟爛如泥矣外荒記南海去會稽三千里有狗國國中有飛涎鳥似鼠兩翼如鳥而脚赤每至曉諸棲禽未散之前各各占一樹口中有涎如

膠遶樹飛涎沾灑衆枝槩有他禽之至而如網也然乃食之如竟去不獲即空中逐而涎惹之無不中焉人若捕得脯治渴其涎每布後半日即乾自落落即布之法苑珠林越地深山中有鳥大如鳩青色名曰治鳥穿大樹作巢如五六升器戶口徑數寸周飾以土壘赤白相分狀如射侯伐木者見此樹即避之去或夜冥不見鳥鳥亦知人不見便鳴喚云咄咄上去明日便急上去咄咄下去明日便宜急下若不使去但言笑而已者人

可止伐也若有穢惡及其所止者則有虎通夕來守人
不去便傷害人此鳥白日見其形是鳥也夜聽其鳴亦
鳥也時有觀樂者便作人形長三尺至澗中取石蟹就
人火炙之人不可犯也越人謂此鳥是越祝之祖 謝
承後漢書楊震卒未葬有大鳥五色高丈餘從天飛下
到震棺前舉頭悲鳴淚出沾地至葬日冲升天上 清
尊錄崔嗣復宿僧寺夜見一物如鶴色蒼黑目炯炯如
燈鼓翅大呼甚厲嗣復皇恐僧曰藏經有之此新死屍

氣所變號陰摩羅鬼 宣室志俗傳人之死凡數日當
有禽自柩中而出者曰殺太和中鄭生者常於隰川
與郡官獵於野有網得一巨鳥色蒼高五尺餘主將命
解而視之忽無所見生驚即訪里中民詢之民有對者
曰里中有人死且數日卜人言今日殺當去其家伺而
視之有巨鳥蒼色自柩中出君之所獲果是乎

格致鏡原卷八十一